

AUTODETERMINAZIOA, LURRALDE TASUNA, NAZIOGINTZA ETA KONPONBIDE DEMOKRATIKOA BULTZATUKO DITUELA DIOTE

Sektore abertzale eta ezkertiarrok biltzeko sortu da Euskal Herritarrok

Gizarte, kultura eta sindikalismoaren munduko hainbat kidek eta ezkerreko sektore politikoek aurkeztu dute Euskal Herritarrok hautes-elkartea. Egungo marko juridiko-politikoa agortua denez Euskal Herria norbanako zein herri eskubideetan oinarrituriko beste egoera batera pasatzeko asmoa duela esan du Arnaldo Otegi.

Iñaki Uriarte / Bilbo

EUSKAL HERRITARROK izenpean urriaren 25ean EAEko hauteskundeetara aurkeztuko den hautes-elkartea atzo aurkeztu zen jendaurrean, Bilbon. Komunikabide ugari eta, mahaiaren atzean, berrogeita hamar bat lagun lagun bildu ziren gizarte, sindikalismo, kultura eta politika sektoreen ekimen berria plazaratzeko.

Jon Idigoras pozik zegoen «ohorezko sakea» egin zuelako Euskal Herritarren ibilbidean. HBko burukidea pozik agertu zen abertzale asko eta ezkerreko hainbat sektoretako jendea ikusita, «ametsa zena errealtate bihurtu baita». HBko burukidearen iritziz, atzokoa «egun historikoa» izan zen, kartzelan dagoen Mahai Nazionalak hasitako bidean aurrera egin delako. Euskal Herritarrok «etorkizunerako proiektu progresista» dela adierazi zuen.

Haren ostean Arnaldo Otegi mintzatu zen, eta EHren egitasmoa azaldu zuen. «Euskal Herria dagoen bidegurutzetik beste eszenatoki batera eraman behar dugu; lurraldetasunean, burujabetzan eta bakean oinarritutako beste eszenatoki batera», nabarmendu zuen. EAEko hauteskundeek Euskal Herriaren lurraldetasuna errespetatzen ez dutela uste duen arren, «Herri Batasuna eta ezker abertzalea prest daude hauteskunde esparrua kolaborazio esparrua bilakatzeko, eta hori da arrazoi inportantea gaur hemen ezkertiar eta abertzale diren hainbat sektore biltzeko».

Estatuaren «itsukeria eta errepresio eroa» gaitzetsi zituen HBko bozeramaileak, nahiz eta agerian utzi «konstante historiko bat» izan direla.

Bestalde, egun indarrean dagoen eredu soziala ez dela EHren gogokoa nabarmendu zuen. «Ezkertiarrok gara, eta ez gaude ados eredu neoliberalarekin, ez eskusio sozialera bultzatzen duten ereduarekin». EHk EAEko Legebiltzarrean izango duen partehartzeaz galdetuta, orain arte HBk egin duen bidetik joango dela argitu zuen Otegi. EHk ez du lehendakari gairik aurkeztuko. HB legez kanpo uzteko borondatea ikusi arren, Otegi ukatu egin zuen hori dela EH sortzeko arrazoi nagusia.

Bere egiten ditu Akordio

Nazionalerako oinarriak • Euskal Herritarrok elkarte sortu berriak bere egiten ditu Herri Batasunak Akordio Nazionalerako plazaratu zituen lau oinarriak: autodeter-



Euskal Herritarrok elkarte bultzatu duen jendearen ordezkaritza zabal bat izan zen atzo aurkezpenean.

XOUSE SIMAL

minazio eskubidea, lurraldetasuna, eraikuntza nazionala eta soziala, eta konponbide demokratikoa. Hortik abiatuta, egungo gatazka politikoa gainditzeko urratsak egin nahi dituela nabarmendu zuen Otegi.

Rafa Díez LABeko idazkari nagusiak agerian utzi zuen une politiko jakin honetan «dauden indar guztiak aktibatzen» ahaleginduko dela Euskal Herritarrok elkarte. Hortaz, «itxaropen eta

konpromiso» mezu bat igorri zuen. Hauteskunde eguna igaro eta gero ere atzo aurkeztutako ekimenak eraikuntza nazional eta sozialean aurrera egiteko tresna izateko borondatea duela nabarmendu zuen.

Bestalde, Jose Ramon Castañosek azaldu zuen ekimen berria «norbanako eta herri eskubideetan sendo finkatua dagoen bake zuzena» lortzeko asmoz sortu dela. «Mugarik ez duen euskal

nazioari atea zabaltzeko hautes-zerrenda» izango dela gaineratu zuen. Bestalde, euskal herritarren herenak ukitzen dituen txirotasun, langabezia eta gizarte bazterketaren aurka egingo duela nabarmendu zuen Gizarte Eskubideen Gutunaren bozeramaileak. Castañosek dei egin zien agiri horrekin bat egin duten 82.000 sinatzaileei babesa eman diezaieten Euskal Herritarroi.

20.000 sinadura 12 egunetan •

Euskal Herritarrok legeztatzeko 20.000 sinadura bildu beharko dituzte notarioen aurrean. Horretarako epea hilaren 15ean amaituko dela oroitarazi zuen Alizia Sturtze historialariak. Hainbat notarioen aurrean bilduko diren sinaduren erdiak Bizkaia dagozkio, 7.500 Gipuzkoari eta 2.500 Arabari. Sinadura kopuru hori boto emateko eskubidea duten pertsonen % 11 dagokio.

Jende ezaguna bultzatzaileen artean

EUSKAL HERRITARROK hautes-elkartea hainbat sektoretako berrogeita hamar bat bultzatzaileekin agertu zen prentsa aurrean. Lehen argazki horretan, Jon Idigoras eta Arnaldo Otegi Herri Batasunako mahaikideekin batera bost sindikatutako partaideak, kulturen nabarmenak eta hainbat herri ekimenetako kide ezagunak agertu zituen. Jon Nicolas EEko Bilboko zinegotzi ohia, Patxi Zabaleta, Iñigo Iruin, Txomin Ziluaga eta Xabier Bareño mahaikide ohia, Kepa Bereziartua ANV-EEko burukidea,

Txomin Arranbide Urepeleko alkate ohia eta Maria Luisa Murgiondo Aguraingo alkate ohia daude Euskal Herritarrok bultzatzen dutenen artean.

Rafa Díez LABeko idazkari nagusiak, EHNE nekazari sindikatuko Alberto Aldasoro, Alberto Bilbao Bilboko Udaleko ELAko delegatua eta ESK zein EILASEko kideak izan zituen alboan.

Kultur mundutik, Alizia Sturtze historialaria, Alfonso Sastre, Pepe Rei eta Jose Lacalle kazetariak, Eva Forest, Eloy Beato antzerkigilea, Abel

Enbeita eta Xabier Amuriza bertsolariak, Federico Krutwig, Jesus Naberran itzultzailea, Aurkene Astibia irakaslea, Txoli Mateos soziologoa, Imanol Agirre Lekeitioko Kale Antzerki Jaialdiko zuzendaria agertu ziren, musikari egun ugariarekin batera. Ainhoa eta Asier Gozategi, Fermin Muguruza, Evaristo La Polla taldeko abeslaria, Iñaki eta Agustín Gil Betagarri taldeko kideak izan ziren musikari horietako batzuk.

Gizarte elkarte askotako kideak ere badira Euskal Herritarrok bul-

tzatzen dutenen artean. Honako hauek dira horietako batzuk: Javier Cunchillos, Nafarroako ikastolen sortzailea; Juanje Soria, Itoizko Solidarioen abokatua; Urko Aiarza, Abokatu Euskaldunen Sindikatuko kidea; Iñaki Moreno sendagilea; Cesar Manzanos, Salhaketa elkarteko partaidea eta EHUKo irakaslea; Iñaki Loizaga intsumisora; Jose Luis Longarte, Bizkaiko Pastoral Obrerako kidea; Martín Orbe apaiza; Isabel Otxoa, Bizkaiko Emakume Asanbladako abokatua; Mauri Jauregi eta Felipe Fernandez, Eus-

kalduna untziolako langile ohia; eta Jose Ramon Castañós, Giza Eskubideen Gutuneko bozeramaileak.

Jose Antonio Torre Altonaga Medius, 19 urte kartzelan eman zituen preso ohia, eta Angelina Solano ere (Ricardo Gartzandia presoaren ama) izan ziren Bilboko agerpenean. Kirol eremutik, Jose Mari Oñate Everest egondako mendizalea, Ibon Urbietta Orioko arraunlaria eta Martxel Toledo Pilota Federazio eta ESAITeko kidea dira hautes-elkartearen beste bultzatzaile batzuk. X